

Uunga

Kalaallit Nunaanni qamutit pisatsersugaanerat aamma atortui pillugit nalunaarut

missingiut

Inatsimmik nalunaarut nr. 995, 26. oktober 2009-meersoq naapertorlugu, Kalaallit Nunaanni aqqusinertigut angallannermik inatsimmi § 4, imm. 1, § 43 aamma § 56, imm. 2 malillugit Aqqusinertigut Angallannermut Aqutsisoqarfiup suliaasai aamma pisinnaatitaaffii kiisalu naammagittaalliorfissaq pillugit nalunaarummi nr. 787, 18. juni 2025-meersumi § 4 naapertorlugu piginnaatitaaneq malillugu tulliuttut aalajangersarneqarput:

Kapitali 1

Nassuiaatit

§ 1. Nalunaarummi matumani tulliuttut ima paasineqassapput:

- 1) Bil-it: Qamutit motorillit, sisamanik amerlanerusunilluunniit imaluunniit larvefod-illit (unngersaasamik assakaasullit), toqqavillit (valse-llit), qamutitallit imaluunniit assigisaannik assakaasulikkat. Tamatuma saniatigut qamutit motor-illit pingasunik assakaasullit, namminneq oqimaassusaat 400 kg.-ut qaangersimappassuk, bil-itut isigineqartarput.
- 2) Qamussuit assartuutit (blokvoyn): Qamutit motorimik ingerlatillit imaluunniit tassunga atanilikkat qamutit, assut oqimaatsunik imaluunniit usinik annertuunik ingerlatsissutit.
- 3) Cykelit: Ingerlatit assakaasullit tukkartakkat, inummut- imaluunniit assartugassanut nammineeeluni atornissaannut naatsorsuussaasut aammalu motoriligaanngitsut.
- 4) Nammineq oqimaassusaa: Qamutit, nalinginnaasumik nassatarisartakkat atortut ilaatillugit oqimaassusaat. Ingerlatit oqimaassusaat, ilaatillugit orsussa, uulia aamma imeq nillusaataasoq kiisalu aquttusoq, nammineq oqimaassutsimut ilaatillugit naatsorsuunneqarneq ajorput.
- 5) Knallertit: Motorimik ingerlatillit marlunnik- imaluunniit pingasunik assakaasullit, sakkortussusaata 50 cm3-inik qaangiinngitsut imaluunniit innaallagissamoortumik motorillit, aqqusinikkullu narlsuukkut 30 km/t-inik sukkanerunngitsumik ingerlatsisartoq.
- 6) Atortoq motorilik: Qamutit motorillit, pingaartumik sullisissatut pisatsersukkat 30 km/t-inillu annerpaamik sukkassuseqarsinnaasutut sanaat aatsaallu annertuumik sananeqaatitigut allannguinnikkut sukkanerusunngorlugit allanngortinneqarsinnaasut. Pisuttumik ingerlanneqarnissamut sanaat qamutit motorillit, atortutut motorilittut isigineqarput.
- 7) Qamutit kalittakkat: Qamutit, sananeqaatimikkut qamutinit allanit kalitarineqartussatut sanaat. Qamutit kalittakkat, qamutitut kalusiuttakkanut, kalittakkanut ikkuttakkanut aammalu atortunut kalusiuttakkanut aggulunneqartarput.
- 8) Sakkoq kalittagaq: Qamutinit kalittakkanit aamma kalittakkanit ikkuttakkanit allaasoq.
- 9) Qamutit kalittakkat: Qamutit kalittakkat, pingaarnertut inunnik imaluunniit usinik assartuinnermut pisatsersugaasut, taamaattoq kalittakkat ikkuttakkat ilaatinngagit.
- 10) Qamut sanerarmioq: Qamut ataatsimik assakaasulik, qamutitut marlunnik assakaasulinnut atassuserneqartartoq pingaarnertullu inunnik usinilluunniit assartuinissamut pisatsersugaasoq.

11) Snescooterit: Larvefod-illit, mede-tallit assigisaannilluunniit pillit qamutit motorimik ingerlatillit qamutit, aputikkoorutigissallugit- aamma narlusuutigut sermimik qallersimasutigut ingerlatissatut immikkut naatsorsuussat namminerlu oqimaassutsimikkut 400 kg.-nik oqimaannerunngitsut.

12) Qamutit atassusertakkat (sættevogn): Qamutit kalittakkat, pingaartumik inunnik imaluunniit usinik assartuinissamut pisatsersukkat, aammalu kaligisumut imatut atassuserneqartartut qamutip imaluunniit usit ilaat qamutitut kaligisunut tunngallutik.

13) Traktor-it: Qamutit (Bil-it) motorimik ingerlatillit, pingaartumik qamutitik allanik imaluunniit sulinermut atortumik kaliginissamut pisatsersugaasut, aammalu sukkanerpaamik 30 km/t.-imik sukkassuseqarnissamut aatsaallu annertuummik sananeqaatitigut allanngueqqaarnikkut sukkanerulersinneqarnissamut sanaajullutik.

14) Cykel-it innaallagissamoortut: Cykelit, motorimik innaallagissamoortumik ikiortilikkat motorinillu allanik piligaanngitsut. Motori ikiorti innaallagissamoortoq qaffasinnerpaamik 750 W-inik nukeraqqusaavoq, sukkanerpaamillu 25 km/t.-inik appasinnerusumilluunniit, aammalu taamaallaat cykelit tukkaavii atortillugit imaluunniit pisunermut inissittaataa atulereqqatillugu, sukkassuseqartitsisinnaatitaalluni.

Kapitali 2

Qamutitut tamanut aalajangersakkat

§ 2. Qamutit suulluunniit imatut pisatsersugaassapput imatullu pitsaassuseqassallutik pisariaqanngitsumik allanut ulorianartorsiortitsinertaqanngitsumik aammalu ajoqutaanngitsumik kiisalu aqqusinermut aseruutaanngitsumik atorineqarsinnaassallutik.

§ 3. Qamutit suulluunniit imatut pisatsersugaassapput aquttusoq pisariaqartumik siumut aamma sanimut naammattumik isikkiveqassalluni.

Imm. 2. Qamutit suulluunniit imatut pisatsersugaassapput, aquttuusup, angallattunik allanik eqqumaffiginninnera allanut saasarneqarani qamutit ingerlassinnaassallugit.

Imm. 3. Qamutit nalunaarummi matumani peqqusissutaasunit imaluunniit akuerisaasunit allaasunik qullernik aammalu akisuttaatinik (refleks-inik) aaqqissuussanik pilersugaaqqusaanngillat.

§ 4. Qamutit motorillit, qamutit kalittakkat kiisalu qamut sanerarmioq, tikikkuminartunik erseqqissunillu fabrikat-imik, type-mik aamma stelnormumik (Bil-it saaniisa normuannik) meqqinik pilersimassapput. Type-mik taaguut aamma stelnormu (Bil-it saaniisa normui) kigartugaassapput imaluunniit assingusumik nungujaallisagaassapput, taamaalluni naqinnernik aamma kisitsisinik piiaaniarneq imaluunniit allannguiniarneq pinngitsoortissallugu.

Imm. 2. Meqqilersuineq peqqussutaasoq taamaallaat fabrikkutilimmit, taassuma sinniisuanit, pisortani oqartussaasumit imaluunniit sillimmasiisarfimmit naliliisartuutitaasumit ikkunneqaaqqusaavoq.

Kapitali 3

Bil-it

§ 5. Bil-it, piuminartumik, isumannaatsumik aammalu sukkasuumik aqunneqarsinnaanissaannut aquummik pilerneqarsimassapput.

Imm. 2. Aquut atoruminartuussaaq, aammalu assakaasut aquutaasut aamma assammik aquutip akornanni atortorissaarutitigut mekanisk-iusumik ataqatigiiffeqassallutik.

Imm. 3. Nungullarnernik assigisaannilluunniit peqquteqartumik, aquuteqarfimmi ataatsimut isigalugu imaluunniit atortuini ataasiakkaani, annertuumik asiillarsimaneqassananilu qasukkartoorsimaneqassanngilaq.

§ 6. Assakaasunut imaluunniit larvefod-inut (unngersaasanut), imaluunniit tamakkununga peqatigiissitanut, tamanut atuuttumik aammalu sukkassutsini tamani, useqassutsinilu tamani, isumannaatsumik, pilertortumik sunniuteqarluartumillu bil-inik unissaasinnaasumik, bil-it unittaammik pilerneqarsimassapput.

Imm. 2. Aquttumit qimanneqarnerminni, uninngavimmi uingasumi bil-inik uninngatitsisinnaasumik bil-it inissisimanerini unittaammik (parkeringsbremse-mik) pilerneqarsimassapput. Inissisimanerini unittaam aammattaaq bil-it ingerlatillugit atorsinnaassaaq.

§ 7. Unittaam (driftbremse) ima aqqitaassaaq aserfallatsaalisassallunilu, taanna unissarnermik piumasaqaataasoq, pisattanut aalajangersimasunut aporfeqartinnagu, unittaatip tutineqaqqaarnerani, anguneqarsinnaassalluni.

Imm. 2. Unittaatip (Driftsbremse-ip) sunniutaa, bil-it takissusaasa sammiviannut naleqqiullugu assigeeqqissaamik agguataagaassaaq.

Imm. 3. Assammik unittaam (Parkeringsbremse-i/håndbremse-i) ima aqqitaassaaq aserfallatsaalisassallunilu, taanna unissarnermik pisariaqartinneqartoq, pisattanut aalajangersimasunut aporfeqartinnagu, unittaatip tutineqaqqaarnerani, anguneqarsinnaassalluni.

§ 8. Bil-it silaannaap naqitsineranik unittaateqarfillit, silaannarmik naqitsineranik pilersuineq ajutuussagaluarpalluunniit, unissarnissamut sunniutaata piumasaqaataasup naammattumik qulakkeernissaanut annertussusilinnik silaannaasivinnik pilerneqarsimassapput. Silaannaasiviit, aalap iminnguunneranik aammalu assingusunik piaassutaasinnaasumik atortumik pilerneqarsimassapput.

Imm. 2. Silaannaap naqitsineranik unittaateqarfik, qerisoornissamut illersuutaasumik atortumik, pilerneqarsimassaaq.

Imm. 3. Unittaateqarfiit (bremsesystemit) allat, unissarnissap piumasaqaataasup angunissaanut, aquttuusup nukersornissaanik naammaginniffiunngitsut, imm. 1-imi aamma 2-mi allassimasut assingi piumasaqaatit naammassisimassavaat.

§ 9. Innaallagiaqarfinniittut ledning-it atortullu allat ima ilusilersugaassapput inissinneqarsimassallutillu attuuttoornissamut (kortslutning-imut) akornngusersuinernullu allanut ulorianaat sapinngisamik annikinnerpaatinneqassalluni.

Imm. 2. Innaallagiaqarfik pisariaqarfiani, attuuttoortoqarnerata (kortslutning-eqarnerata) kingunerisaanik ikuallattoqarnissaa pinngitsoortinniarlugu, sikring-ilersugaassaaq (innaallagissamut isumannaallisaasersugaassaaq).

§ 10. Bil-it marlunnik qanittorsiutunik aammalu minnerpaamik marlunnik ungasissorsiutunik, qaqortumik imaluunniit sungaarujuttunik qaamanilinnik, pilerneqarsimassapput. Qanittorsiutit taartoortitsinatik bil-it siornannik aqqusineramik minnerpaamik 30 m.-inik qaammarsaasinnaassapput. Qulliit ungasissorsiutit bil-it siornannik aqqusineramik minnerpaamik 100 m.-inik qaammarsaasinnaassapput.

Imm. 2. Sumiinnermik ersersitsisunik qaqortunik siumut sammisunik marlunnik aammalu tunummut sammisunik aappaluttunik marlunnik bil-it pilerneqarsimassapput. Qulliit taartoortitsinatik 300 meterinik ungasissusilimmiit erseqqissumik takuneqarsinnaassapput.

Imm. 3. Bil-it qullernik ataatsimik imaluunniit arlalinnik normuplade-mik tunorlermik qaammarsaasunik pilerneqarsimassapput, taamaallilluni bil-it tunuanniit minnerpaamik 20 m.-iniit atuarneqarsinnaassalluni.

Imm. 4. Qulliit sumiissusermik ersersitsissutit-, tunorliit- aamma normuplademut tunorlermut qaammarsaatit, qulliit qanittorsiutit, ungasissorsiutit imaluunniit pujorsiutit ikumatillugit qaminneqarsinnaassanngillat.

Imm. 5. Bil-it qullernik sungaartunik nalunaaqutsiussatut sanerarmiunik pilerneqarsinnaapput.

§ 11. Bil-it minnerpaamik ataatsimik siuata aamma tunuata saneraasigut illugiissillugit sanguffiginiakkap tungaanut ikittaqattaarummik aammalu minnerpaamik ataatsimik saneraasigut illugiissillugit ikittaqattaarummik pilerneqarsimassapput. Ikittaqattaarut sanerarmioq ikittaqattaarummut siorlermut ataqatigiissillugu sananeqaateqarsinnaavoq. Qulleeqqat taakkua sungaartuussapput (oranget) seqinneraluarpalluunniit erseqqissuussallutik. Minutsimut 60-iniit 120-inut akuttussusilimmik ikittaqattaartassapput aquttullu issiaviani ersitsumut qulleeqqamut nakkutilliissumut imaluunniit nipiliortumik nakkutilliissumut ataniligaassallutik.

Imm. 2. Bil-it, unissarnermut qullernik aappaluttunik tunummut sammisunik minnerpaamik marlunnik, unitaatip tutineqarniarnerani qaammartartunik pilerneqarsimassapput. Unissarnermut qulliit, tunummut qullerniit annertuumik qaammaarinnerussapput.

Imm. 3. Bil-it, siggartaammik erseqqissumik ataannartumillu assigiissumik nipilimmik pilerneqarsimassapput. Silaannaap naqitsineranik siggartaatit, silaannaap naqitsineranik unittaateqarfinni, silaannaasivinnut toqqaannartumik ikkusimaqqusaanngillat.

§ 12. Bil-it, minnerpaamik aappaluttunik marlunnik tunummut akisunnertalinnik (bagrefleks-inik) pilerneqarsimassapput.

Imm. 2. Bil-it, 6 m-init takinerusut, imaluunniit kalitariinnut ilaasut, minnerpaamik marlunnik sungaartunik sanerarmiunik akisunnertalinnik (siderefleks-inik) saneraani illugiissillugit pilerneqarsimassapput.

§ 13. Qulliit, qulleqatigiinni ilaasut, ilaatillugit angeqatigiillutik, qalipaateqatigiillutik aamma qaamassuseqatigiillutik, assigiissapput. Aammattaaq bil-it takissusaasa sammiviannut assigiimmik aammalu aqqusinermiit portoqatigiissumik inissinneqarsimassallutik.

Imm. 2. Qulliit qanittorsiutit, qulliit pujorsiutit, qulliit sumiissutsimik ersersitsisut, qulliit tunorliit, unissarnermut qulliit aamma tunummut akisuttaatillit (bagrefleks-it), aqqusinermiit naleqquttumik portussuseqatillugit, aammalu bil-it sananeqaatitigut atuinermillu periarfissaqarnera naapertorlugu teqeqquinut sapinngisamik qanillisillugit inissinneqarsimassapput.

§ 14. Bil-it ikiuiartornermik ingerlatsinissamut akuerisaasut, minnerpaamik ataatsimik ikiuiartornermi ikumatittakkamik ikittaqattaartumik (tungujortumik ikittaqattaartumik) pilerneqarsimassaaq.

§ 15. Illugiaani (naligiimmik amerlassusilinnik), saneraasa killinginut ersiutiniq qullernik aamma ilassutitut sumiiffimmik ersersitsiniutitut- aamma tunuani qullernik kiisalu uteriarsornermut qullernik aamma suliaqarnermut qullernik bil-it pilerneqarsimasinnaapput.

Imm. 2. Bil-it qullernik pujorsutiniq siorlernik aammalu qullermik pujorsiummik tunorlernik ataatsimik marlunnilluunniit pilerneqarsimasinnaapput.

Imm. 3. Nalunaaqutsiussatut qullermik (sungaartumik ikittaqattaartumik) ataatsimik arlalinnilluunniit pilerneqarsimasinnaapput. Qulliit taamaattut, bil-it aqqusinermi sulinermit atatillugu uninngaffigeqqusaanngitsumi uninnganermi imaluunniit aqqusinertigut angallannermi maleruagassanut unioqqutitsisumik imaluunniit aqqusinermi angallatunut allanut ulorianartorsiortitsinermit nassataqarsinnaasumik ingerlariaaseqarnermi taamaallaat atoqqusaapput.

§ 16. Bil-it motoriat ima pisatsersugaassallunilu aserfallatsaaliugaassaaq, pisariaqanngitsumik pujuliussanani aamma nipiliussanani.

Imm. 2. Motorip pujoorfeqarfia nipikillisaammik pilerneqarsimassaaq.

Imm. 3. Orsussaasivik aamma orsussamullu innaallagissamut aqqutit, orsussamut kissamullu akiuussinnaasunik, qajannaatsunik nungullajaatsunillu sananeqaatinik sanaajussapput. Orsussaasivik sananeqaammik ikuallassinnaanngitsumik sanaajussaaq.

Imm. 4. Orsussaasivik aamma orsussamut innaallagissamut aqqutit, ima ilusilersugaassapput, inissitaassapput aamma katitigaassallutik, bil-it nalinginnaasumik atornerarneranni sajuppilunnerit il.il. nungullariartortitsinissamut imaluunniit kittorartoortoqarnissaanut ulorianaateqassanani.

§ 17. Bil-it allequtaat saanii imaluunniit imminut kiveqqasut silarlequtitut qaavat, bil-it nalinginnaasumik atornerarnerini useqartinneqarnerinilu pilersartunik sunnertinnermik attassisinnaassapput, ajoqusersimasuussanatillu imaluunniit allatut illoqissersimassanatik imaluunniit ima aasimatigissanatik aqqusinertigut angallannermi isumannaassusermut ulorianaataallutik.

§ 18. Bil-it aksel-ii tamarmik sunniuteqarluartumik ajorinnguissuseqartinneqassapput. Amerlanerpaamik inunnut qulingilunoortut inuinnarnut bil-it kiisalu nioqqutissanik assartuutit bil-it, assakaasuini tamani maniilakuluttukkut tammissarnikillisaatinik pilerneqarsimassapput. Bil-it allat assakaasui siorliit maniilakuluttukkut tammissarnikillisaatinik pilerneqarsimassapput.

Imm. 2. Assakaasulerfiit aamma ajorinnguuitsut qajannaatsuliaassapput isumannaatsumillu aalajangersugaassallutik. Napisoqarsimanera imaluunniit nungullartoqarsimanera pissutaallutik tamaat ataatsimut isigalugu imaluunniit pisattatigut ataasiakkaatigut assakaasoqarfimmi annertuumik asiilagunneqaqqusaanngilaq.

§ 19. Bil-it assakaasuini tamani imaluunniit larvefod-iini (unngersaasaani) qalequtiniq (dæk-inik) pilerneqarsimassapput.

Imm. 2. Assakaasut qalequtaat, larvefod-it aamma assakaasut lejerii il.il. ajoqusersimasuussanngillat aammalu assakaasut qalequtaat nungullariartorfiini tamani pingaarnertut allalersugaanerminni minnerpaamik 1,6 mm.-inik itissusilinnik allalersugaaneri itissuseqassapput.

Imm. 3. Assakaasut qalequtaat ukiorsiutit 1. maj-imiit 30. september-ip tungaanut atoqqusaanngillat. Assakaasut qalequtaat ukiorsiutit atorineqassappata, assakaasut tamarmik qalequttanik taamaattunik pilerneqarsimassapput. Ukiorsiutit kapinartulersuutitai, bil-it useqartinnagit qalequtinik uuttuilluni, assakaasut qalequtaasa qaavinit 2 mm.-init nuisanerussanngillat.

Imm. 4. Angallannermut isumannaassusermut eqqarsaatigisassat pisariaqartitsippata, aqquuserngit bil-erfiillu ingerlatarineqarnerinut akisussaasuusut kommunimi oqartussaasut isumasioqatigineri malillugit atuuttunik aamma naatsorsuutigineqartut bil-erfissanik naliliinerit tunulequtaralugit Kalaallit Nunaannut tamarmut imaluunniit nunap assingani sumiiffiit aalajangersimasut iluanni, Kalaallit Nunaanni Politimesteri imm. 3-mi eqqaaneqartumik piffissamik killiliisinnaalluni imaluunniit sivitsuisinnaavoq.

§ 20. Bil-it silarlequtitut qaavat, usisarfiaq sananeqaataallu allat, bil-it atortuinut kiveqqatitsisunut qajannaatsumik aalajangersimassapput imatullu ilusilersorsimassallutik aammalu aserfallatsaaliugaassallutik sinarsuit ipittut imaluunniit atortut avalassaangasut angallattunut allanut pisariaqanngitsumik ulorianartorsiorititsissanatik.

Imm. 2. Assakaasut tamarmik assiaqutinik pilersorneqarsimassapput, taamaallutik siumut narlusuumik ingerlaarnermi, angallattut allat assakaasunit serpalinneqarnissamut illersorneqarlutik.

Imm. 3. Matunut parnaarsaatit aamma -qiversartut imatut ilusilersugaassapput aamma aserfallatsaaliugaassapput ingerlaarnermi matut ammartoornissaannut isumannaallisagaassallutik.

Imm. 4. Attaviliinermut atortoq qajannaatsumik bil-it atortuinut kiveqqatitsisunut aalajangerneqarsimassaaq, attaviliissutillu siunertaanngitsumik kaanngartoornissaannut pitsaaliusumik mekanisk-iusumik isumannaallisaammik pilerneqarsimassalluni.

§ 21. Bil-it akuerisaasumik tamakkerlutik 3.500 kg.-t sinnerlugit oqimaassusillit, talerpiata tungaasigut assiaqummik sanerarmiumik pilerneqarsimassapput.

Imm. 2. Assiaqut sanerarmioq imatut ilusilersugaallunilu inissisimassaaq, imatullu

1) plade-mik imaluunniit sanimukaartunik stanginik, minnerpaamik 0,05 m.-itut portutigisunik, minnerpaamillu 0,30 m.-ik akuttutigisumik sanaajussalluni,

2) qajannaatsumik siunertamullu naapertuuttumik bil-inut aalajangersugaasimassalluni,

3) bil-it ingerlariaannaasutut oqimaassusaanni, aqqusinnermiit minnerpaamik 0,95 m.-inik portussusilimmik, imaluunniit annerpaamik qaavatigut aalajangeqqasumut sanarfisamut 0,35 m.-inik portussusilimmik qangatassuseqarput,

4) bil-it ingerlariaannaallutik oqimaassusaanni, aqquuserngup qulaani qaffasinnerpaamik 0,55 m.-inik ataak killeqassapput,

5) bil-it qalequtaasa avasinnerpaartaasa iluanni inissisimatinneqassapput, taamaattoq annerpaamik 0,12 m.-inik.

Imm. 3. Bil-it saneraanni assiaqutip isui, bil-it atortuisa qajannaakkat allat tunuanniinngippat, 0,10 m.-inik illumut sangungasumik, ammukaartumik atasuinnarmik sananeqaateqassapput.

Imm. 4. Ataavartumik qajannaarsukkat atortut, ilaatillugit karsit aamma tankit, tamatumunnga piumasaqaatinik allanik eqqortitsippata, saneraani assiaqutitut sanaajusinnaapput.

Imm. 5. Sinarsuit aamma teqeqqut silarliit tamarmik, minnerpaamik 2,5 mm.-inik radius-ilerlugit ammalorsarneqarsimassapput. Bolt-it niaquusai assigisaallu ammalorsakkat, qaavaniit 10 mm.-it tungaannut anillangasinnaapput.

Imm. 6. Saneraani assiaqutit, aksel-it ungasissusaat annerpaamik 2,10 m.-uppat, aksel-it aquutaasut marluk akornanni, assiaqutit atunngiinnarneqarsinnaapput.

Imm. 7. Annerpaamik 0,30 m.-inik assakaasut akornanni akunneqaqqusaavoq, taamaattoq aksel-it aquutaasut akornanni 0,50 m.-it tikillugit akunneqaqqusaalluni.

§ 22. 1. januar 1975-ip kingorna siullermeertumik nalunaarsugaasut, amerlanerpaamik inunnut qulingilunoortut inuinnarnut bil-it, issiavinni siorlarni issiaviit tamarmik, issiaviit patitsittakkat ilaatinngit, isumannaallisaatitut qitequtaasalersugaassapput.

Imm. 2. 1. januar 2000-ip kingorna siullermeertumik nalunaarsugaasut, amerlanerpaamik inunnut qulingilunoortut inuinnarnut bil-it, issiavinni siorlarni issiaviit tamarmik, issiaviit patitsittakkat ilaatinngit, kiisalu issiavinni tunorlarni issiaviit siumut sammisut tamarmik, issiaviit patitsittakkat ilaatinngit, isumannaallisaatitut qitequtaasalersugaassapput.

Imm. 3. 1. januar 2009-p kingorna siullermeertumik nalunaarsugaasut, amerlanerpaamik inunnut qulingilunoortut inuinnarnut bil-it, issiavii tamarmik, isumannaallisaatitut qitequtaasalersugaassapput.

Imm. 4. Nioqqutissanik assartuutit bil-it akuerisaasumik tamakkerlutik 3.500 kg.-t ataallugit oqimaassusillit, 1. januar 1975-ip kingorna siullermeertumik nalunaarsugaasut, issiavinni siorlarni issiaviit tamarmik, issiaviit patitsittakkat ilaatinngit, isumannaallisaatitut qitequtaasalersugaassapput.

Imm. 5. Nioqqutissanik assartuutit bil-it akuerisaasumik tamakkerlutik 3.500 kg.-t sinnernagit oqimaassusillit, 1. januar 2009-p kingorna siullermeertumik nalunaarsugaasut, issiavii tamarmik, isumannaallisaatitut qitequtaasalersugaassapput.

Imm. 6. 1. januar 2009-p kingorna siullermeertumik nalunaarsugaasut, inunnik qulingiluanik amerlanerusunik ilaasoqarsinnaasut inuinnarnut bil-it, illoqarfimmi bussiuungippata, issiavii tamarmik, isumannaallisaatitut qitequtaasalersugaassapput.

Imm. 7. 1. januar 2000-ip kingorna siullermeertumik nalunaarsugaasut lastbil-it akuerisaasumik tamakkerlutik 3.500 kg.-t qaangerlugit oqimaassusillit, issiavii siumut sammisut tamarmik, isumannaallisaatitut qitequtaasalersugaassapput.

§ 23. Bil-it igalaavi nipititigaassapput imaluunniit igalaajussallutik mattussakkat, imaluunniit sequmiaallisakkat, materiale-t erseqqaarissut, kigartorsimasuunatik imaluunniit ima ajoqusigaatiginngitsut isikkiviluttuullutik.

Imm. 2. Igalaq saarleq, silataagut mekanisk-iusumik igalaanut saligummik pilerneqarsimassaaq, aamma silataagut errortuuteqassalluni.

Imm. 3. Bil-it iluanni aquttumut tarrarsuummik, aamma silataasigut illugiinnik aquttumut tarrarsuutini, taamaattoq amerlanerpaamik inunnut qulingilunoortut inuinnarnut bil-it taamaallaat saamerliinnarmik, pilerneqarsimassapput. Tarrarsuutit imatut inissitaassapput aquttumut, bil-it ilusilersugaanerit aamma useqartiginerat apequtaanani tunumut naammattumik isikkiveqassalluni.

Kapitali 4

Snescooter-it

§ 24. Snescooterit, aquuteqarfimmik, qamutitik piuminartumik, isumannaatsumik pinasuartumillu aqutisinnasumik pilerneqarsimassapput. Aquut isumannaatsumik qajannaagaassaaq sisoraatinullu aquutaasunut toqqaannartumik atassuteqassalluni.

Imm. 2. Snescooterini, sananeqaatikkut aalajangigaasoq annerpaamik sukkassuserineqartussaq 10 km/t-init sukkaneruppat, aquuteqarfik ima sanarfisaassanngilaq, larvefod-it marluk akornanni sukkassutsimik assigiinngissummit qamutit sammivimmigut allanngortarnerat aalajangigaasassanani.

§ 25. Snescooterit unittaammik (driftsbremse-mik), qanorluunniit sukkassutsimi aammalu useqassutsini tamani, isumannaatsumik, pilertortumik aamma sunniuteqarluartumik qamutitik unissaasinnaasumik pilerneqarsimassapput. Motoriata nutsisoqarfiani unittaateqarfilersugaappata, unittaateqarfiit aamma larvefod-ip akornanni attavik, kæde-nut, tandremme-nut imaluunniit pujaallisaatinut attuumassuteqanngitsunik atortulersugaassapput. Unittaatinut (driftsbremse-nut) aammattaaq § 7, imm. 1 aamma 2 atuupput.

Imm. 2. Snescooterit, aquutuata qimaqqanerani sumiiffimmi uingasumi qamutit uninngassutigisinnasaannik inissiinermit unittaammik (parkeringsbremse-mik) assigisaannilluunniit aaqqissuussamik, pilerneqarsimassapput. Inissiinermit unittaammut (parkeringsbremse-mut) aammattaaq § 7, imm. 3 atuuppoq.

§ 26. Innaallagiaqarfiinut aamma siggartaammut § 9 aamma § 11, imm. 3 atuupput.

Imm. 2. Ingerlaarnerup nalaanni aquuttoq katataassagalarpat, qamutit motor-iata uninnissaanik qulakkeerisumik ikittaateqarfiani ajutoornermit qamittaammik assigisaannilluunniit, snescooter-it pilerneqarsimassapput.

§ 27. Qullermik qanittorsiummik, qullermik ungasissorsiummik, minnerpaamik unissarnermut qullermik ataatsimik aammalu minnerpaamik tunummut akisuttaammik (bagrefleks-imik) ataatsimik snescooter-it pilerneqarsimassapput. Snescooter-it qullii aamma akisuttaataa, bil-inut piumasaqaatit assingi eqqortissavaat.

Stk. 2. Snescooterit tulluuttunik pilerneqarsimasinnaapput

- 1) § 11, imm. 1-i naapertorlugu bil-inisulli, saavani tunuanilu sanguffiginiakkap sammivianut ikittaqattaarutit,
- 2) § 15, imm. 1-i naapertorlugu qulliit pujorsiutit, saneraani nalunaaqqutitut qulliit, ilassutitut sumiinnermik-aamma tunuani qulliit, uteriarsornermut qulliit aamma bil-inisulli suliaqarnermit qulliit, aamma
- 3) normuplademut qulleq.

§ 28. Snescooter-it saaniinut, aquutitut sisoraateeraannut, ajorinngujitsuusinnaasunut kiisalu saavata assiaqutaannut § 17, § 18, imm. 2, aamma § 20 atuupput.

Imm. 2. Snescooterit igalaavannut aamma tarrarsuutaannut § 23, Imm. 1 aamma 3 atuupput.

Imm. 3. Snescooterit igalaavata aquuttup ingerlaarnermit nalinginnaasumik issianermini siumut isikkivia tamakkersimappagu § 23, imm. 2 atuuppoq.

Kapitali 5

Traktor-it aamma atortut motor-illit

§ 29. Traktorit imaluunniit atortup motor-illit aquuteqarfiannut § 5 atuuppoq. Taamaattoq aquutip assassortaataata (aquutip) aamma assakaasut aquutaasut akornanni attavik uuliap naqitsineranoortuusinnaavoq (hydralik-iusinnaavoq).

Imm. 2. Traktori aquummut oqilisaatitalik (servostyring-ilik), aquummut oqilisaatitaa (servostyring-ia) ajutooraluarpalluunniit, aquunneqarsinnaassaaq.

§ 30. Traktorit unittaammik (driftbremse-mik) minnerpaamik aksel-imi ataatsimi assakaasuni atuuttumik, kiisalu inissiinermi unittaammik (parkeringsbremse-mik) pilerneqarsimassapput.

Imm. 2. Unittaammut (driftbremse-mut) aamma inissiinermi unittaammut (parkeringsbremse-mut) aammattaaq § 6, imm. 1, aamma imm. 2-mi oqaaseqatigiit siulliit, aamma § 7, imm. 1-3 atuupput.

§ 31. Traktorit, taartoortitsinatik aqqusinermik minnerpaamik 30 m.-inik siumut qaammarsaasinnaasunik marlunnik qullernik qanittorsiutinik pilerneqarsimassapput. Aquttarfiata qaavani inissitanik siumoortunik, traktor-it ilassutitut marlunnik qullernik qanittorsiutinik pilerneqarsimasinnaapput.

Imm. 2. Traktorit, bil-isulli sumiinnermik nalunaaqqutaasut qulliit, tunuani qulliit, sammivimmik nalunaarutit qulliit, tunuani akisuttut (refleks-it) siggartaatip aammalu unissarnermut qulliit assinginik, pilerneqarsimassapput.

Imm. 3. Traktorit qullernik ungasissorsiutinik aammalu taakkuninnga § 15-imi eqqaaneqartunnik qullernik pilerneqarsimassapput. Nalunaaqqutitut qulliit aammattaaq ingerlaarnerup nalaani atorneqarsinnaatitaapput.

§ 32. Traktorit, § 23, imm. 3-mi oqaaseqatigiit aappaat naapertorlugu inissinneqarsimasumik minnerpaamik ataatsimik aquttumut tarrarsuummik, pilerneqarsimassapput.

Imm. 2. Kitsinngit aputisiutit assigisaallu, piffissami 1. majimiit 30. septemberip tungaanut atorneqaqqusaanngillat. Piffissami tamatumani kitsinngit sullisit, ingerlaarnerup nalaani nassartuagassamik politiinit akuersissuteqarluni taamaallaat, atqusaapput.

Imm. 3. Traktorinut aammattaaq §§ 9, 16 aamma 17, § 18, imm. 2, § 19, § 20, imm. 1, 3 aamma 4, aamma § 23, imm. 1, aamma imm. 2, immikkoortua siulleq, atuupput.

§ 33. § 1, nr. 7-mi oqaaseqatigiit siulliit naapertorlugit atortoq motorillip, traktorinut piumasaqaatit assingi eqqortissavai. Taamaattoq § 19 aqqusinernut manissaassuarnit eqqortinnissaa piumasaqaataanngilaq.

Imm. 2. 6 m.-inik takinerusooq atortoq motorilik, minnerpaamik akisuttunik marlunnik sungaartunik pilerneqarsimassaaq.

Imm. 3. § 1, nr. 6-mi oqaaseqatigiit aappaat naapertorlugu inummit pisuttumit aqunnissaanut naatsorsuussaaq atortoq motorilik, imatut pisatsersugaassaaq, aquttup tigummivik iperarpagu isumaminik unittussiaalluni. Atortoq motorilik taamaattoq, piffissami qullernik ikumatitsiffiusumi, saamiatungaani inissitanik sumiinnermut nalunaaqutaasunik- aamma tunummut qullernik pilerneqarsimassaaq.

Kapitali 6

Knallertit

§ 34. Knallertit type-at oqartussaasunit akuerineqarsimassapput.

§ 35. Knallertit piuminartumik, isumannaatsumik pinasuartumillu aqunnissaannut Knallert-it aquuserneqarsimassapput.

Imm. 2. Knallertini marlunnik- aamma pingasunik assakaasulinni, aquutaa qajannaatsumik assakaasulerfimmumt siorlermut aalajangersagaassaaq, aquullu atoruminartuussalluni. Assammik aquutip assakaasullu aquutaasup akornanni mekanisk-iusumik atassusigaassapput.

Imm. 3. Nungullarsimanermik assigisaannilluunniit peqquteqartumik, ataatsimut isigalugu imaluunniit atortuini ataasiakkaani aquuteqarfiani annertuumik qasuttoorsimaneqassanngilaq.

§ 36. Knallertit, siumut qullermik qaqortumik imaluunniit sungaarujuttumik, taartoortitsinani knallertip siornanik aqqusinermik minnerpaamik 30 m.-inik qaammarsaasumik pilerneqarsimassapput. Knallertit marlunnik assakaasullit, erseqqissumik aappaluttumik qullermik aamma akisuttumik aappaluttumik pilerneqarsimassapput.

Imm. 2. Knallertit pingasunik assakaasullit, tunummut qullernik assigiinnik marlunnik aamma akisuttunik aappaluttunik marlunnik assigiinnik pilerneqarsimassapput. Tunummut akisuttut (refleks-it) aqqusinermiit naleqquttumik portussuseqartillugit aammalu sananeqaataat atugaanerallu naapertorlugit sapinngisamik knallertip sinarsuinut qaninnerpaatillugit inissisimassapput. Tunummut qulliit aamma tunummut akisuttut aammattaaq, knallertit takissusiisa sammiviat malillugu assigiissillugit aqqusinermiillu portoqatigiissillugit inissisimatinneqassapput.

Imm. 3. Knallertit, qullermik ungasissorsiummik, unissarnermut qullermik aamma sanguffiginiakkamut ersersitsisunik ikittaqaataarutunik sungaartunik (orange-nik) pilerneqarsimasinnaapput.

§ 37. Knallertit erseqqissumik ataasiusumik nipilimmik siggartaammik imaluunniit sianermik pilerneqarsimassapput.

Imm. 2. Knallertit sanerarmiumik qamummik ataniligaaqqusaanngillat.

§ 38. Knallertit unittaammik (driftsbremse-mik), sukkassutsini suniluunniit aamma useqassutsini tamani knallertinik isumannaatsumik, pilertortumik aamma sunniuteqarluartumik unissaasinnaasumik pilerneqarsimassapput.

Imm. 2. Unittaat (driftsbremse) imatut aaqqitaassaaq aserfallatsaaliugaallunilu, unissarnermut sunniut pisariaqartinneqartoq atueriarnermi siullermi, assassortagaq imaluunniit tukertagaq unittaat atortunut aalajangeqqasunut attuunnagu anguneqassalluni.

Imm. 3. Knallertit unissarnermi sanimoorusussuseqassanngillat.

§ 39. Knallertit pingasunik assakaasullit, aquttuusup qimaguteqqanerani sumiiffimmi uingasumi knallert-inik uninngatitsinnaasumik, inissiinermi unittaammik.

Imm. 2. Inissiinermi unittaat (parkeringsbremse) imatut aaqqitaassaaq aserfallatsaaliugaallunilu, uninnganissamut sunniut pisariaqartinneqartoq, assammik eqillugu imaluunniit tukertagaq unittaat, atortunut aalajangeqqasunut attuunnagu anguneqarsinnaalluni.

Kapitali 7

Sikkilit (Cykelit)

§ 40. Sikkilit qamummik isumannaatsumik, sukkasuumik sunniuteqartumillu unitsitsisinnaasumik unittaateqassapput. Unittaat assakaasumi kingullermi unittaataassaaq assakaasup qeqqanut tunngasoq imaluunniit assakaasumi siullermi kingullermilu assakaasut sinaakkutaanni unittaataassalluni.

Imm. 2. Sikkilit tunuani akisuttumik (refleks-imik) aappaluttumik piligaassapput sungaartunik aalasinnaasunik tunuanit takuneqarsinnaasumik reflekseqassalluni (katteøjje) ersarissumillu nipilimmik sianeqassallutik. Sikkili piffissami qulliit ikumasussaaffianni ingerlanermi aamma siuani qaqortumik ersarissumik ikumasumik qulleqassaaq ersarissumillu takuneqarsinnaasumik tunuanni aappaluttumik qulleqassalluni.

Imm. 3. Sikkilit meeqqamut immikkut issivissalikkat assakaasuani siullermi assakaasuani kingullermi unittaateqassapput assakaasullu meeqqap isigaasa assakaasup noqarutaani kigginnissaannik pinngitsoortitsisinnaasumik assiaquteqassallutik.

§ 41. Sikkilit innaallagissamoortut, § 40-mi sikkilinit piumasaqaatit eqqortinneqassapput.

Imm. 2. Sikkilini innaallagiatortumik ingerlatsisup ingerlanermini sikkilernermini niaqorornaveeqqut sukaterussa atussavaa.

Imm. 3. Sikkilit innaallagissamoortut pisunnermi atortumik innaallagiatortumik atortoqassapput, taamaalilluni tukkaaviit assigisaalluunniit sikkilertumit namminermit atorineqanngikkaluarpa, ikittaat innaallagiatortoq, assersuutigalugu toortagaq imaluunniit tigummivik sangusaat aquutaani ikkusimasooq peqatigitillugu atorineqanngikkaluarpa, sukkassutsimik 6 km/t ataalluguluunniit sakkortussuseqarsinnaassalluni. Motor-ip tapertaasup innaallagiatortup kaajallattarnera aquummi aquunneqarunnaarpat nammineq unissaaq.

Kapitali 8

Qamut kalittagaq

§ 42. Qamut kalittagaq oqimaassusia tamarmiusooq 750 kg imaluunniit qamutip kalitsisup nammineq oqimaassusianit 50 procenti sinnerlugu oqimaassusilik, ingerlanermi unittaateqassaaq inissiinermilu unittaateqassalluni. Ingerlanermi unittaat qamutip kaligisup unittaataanut atassuteqassaaq imaluunniit unittaat nammineq atuutilertartuussalluni. Ingerlanermi unittaat assakaasuni tamani atorsinnaassaaq kalitamullu ikkussisarfik ajortippat qamut nammineq unissinnaassalluni.

Imm. 2. Imm. 1-i naapertorlugu ingerlaarnermi unittaatinut aamma inissiinermi unittaatinut aammattaaq §§ 6 aamma 7 aamma § 8, imm. 1 aamma 3 atuupput.

§ 43. Qamut kalittagaq ikinnerpaamik marlunnik aappaluttunik tunuani qulleqassaaq qamullu nummerpladeqarpat nummerplade qulleqassalluni. Qamut kalittagaq aamma tunuani sanguniarnermi

ikittaqattaarutiniq qulleeraqassaaq unissarnermullu qulleqassalluni. Qulliit qamutip kalitsisup innaallagiarfiinut atassuserneqarsimassapput biillinullu piumasaqaatit assingi eqqortinneqassallutik.

Imm. 2. Qamut kalittagaq ikinnerpaamik marlunnik qaqortunik akisuttoqassaaq (reflekseqassaaq) tunuani aappaluttunik sungaartunillu illugiinnik akisuttoqassalluni (refleks-eqassalluni). Tunuani refleksit pingasunik teqeqqoqassapput inngiginnertaalu qummut saatillugu ikkusimassalluni. Siuani saavanilu refleksit pingasunik teqeqqoqassanngillat. Siuani tunuanilu refleksit § 13 naapertorlugu ikkusimassapput.

Imm. 3. Qamut kalittagaq saavani qullermik sungaartumik nalunaaqummik qulleqarsinnaavoq.

§ 44. Qamummi kalittakkami saanermut, usisarfik sannaalu kiisalu assakaasuinut nivinngaateriffik, assakaasup ammalortortaa assakaasullu lejer-ii eqqarsaatigalugit § 17-imi, § 18, imm. 2-mi, § 19, imm. 2-mi aamma § 20, imm. 1-imi piumasaqaatit eqqortinneqassapput. Biilip kalittakkami qamummilu usisaammi ajorinnguuitsuliineq, assakaasup qalequtaat assiaqutillu eqqarsaatigalugit aamma § 18, imm. 1-imi oqaaseqatigiit siullianni aappaanilu, § 19-imi aamma § 20, imm. 2-mi piumasaqaatit eqqortinneqassapput.

Imm. 2. Ikkussinermi atortoq qajannaarluarsimassaaq aamma qummut amnullu aamma sanimut naammattumik aalasinnaassalluni. Ikkussinermi atortoq qamummut kalittumut naleqqutissaaq ikkussinermilu atortui annertuumik qasukkarsimassanatik.

§ 45. Qamut kalittagaq assartornermut pisatsersugaq 3.500 kg sinnerlugit tamarmi oqimaassuseqarnissaanut akuerisaasoq talerpiata tungaani § 21, imm. 2-mit 7-imut piumasaqaatit eqqortillugit saavani assiaquteqassaaq.

Kapitali 9

Qamussuit assartuutit

§ 46. Qamussuarnut assartuutitut motorimik ingerlateqartunut kapitali 3 atuuppoq.

Imm. 2. Qamussuarnut assartuutitut qamummit motorimik ingerlateqartumut kalinneqartumut kapitali 8 atuuppoq, kisianni § 44, imm. 2 pinnagu.

Imm. 3. Qamussuaq assartuut qamulluunniit kalitsisoq aqqusinermi isikkivinnit tamanit ersarissumik takuneqarsinnaasumik nalunaaqutsiisummik qulleqassapput.

Kapitali 10

Unioqutitsinerit

§ 47. §§ 2-mit 9-mut, § 10, imm. 1-imit 4-mut, §§ 11-mit 14-imut, § 15, imm. 3 oqaaseqatigiit aappaannik, §§ 16-imit 26-mut, § 27, imm. 1-imik, §§ 28-mit 30-mut, § 31, imm. 1 oqaaseqatigiit siulliannik, aamma imm. 2-mik, § 32-mik, § 33, imm. 1 oqaaseqatigiit siulliannik, aamma imm. 2-mik aamma 3-mik, §§ 34-mik aamma 35-mik, § 36, imm. 1-imik aamma 2-mik, §§ 37-mit 42-mut, § 43, imm. 1-imik aamma 2-mik, aamma §§ 44-mit 46-mut unioqutitsisoq, Kalaallit Nunaanni pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsisitigut akisussaasut) Kalaallit Nunaanni pinerluttulerinermik inatsimmi kapitali 5-imi malittarisassat malillugit pinerluttulerinermik eqqartuussummut akisussaatinneqarsinnaapput.

Kapitali 11

Atuutilersitsinermut ikaarsaarnermilu aalajangersakkat

§ 48. Nalunaarut ulloq 1. januar 2027 atuutilersinneqassaaq.

Imm. 2. Qamutit aaqqissugaanerit atortuulu pillugit Kalaallit Nunaanni nalunaarut nr. 141, 27. marts 1979-imeersoq atorunnaarsinneqarpoq.

Imm. 3. Motorcykelinut, Kalaallit Nunaanni qamutit aaqqissuunnerit atortuulu pillugit nalunaarummi nr. 141, 27. marts 1979-imeersumi malittarisassat maannamut atuuttut atuupput.

§ 49. Nalunaarut illersornissamut suliaasaqarfinnut Kalaallit Nunaata illersorneqarnera pillugu Kunngaqarfinni Danmarkimi aamma Amerikas Forenede Staterimi naalakkersuisut akornanni Atlantikup avannaa pillugu isumaqatigiissut naapertorlugu isumaqatigiissut ulloq 27. april 1951-imi Københavnimi atsiorneqartoq naapertorlugu nalunaarut nr. 23, 20. juni 1951-imeersumi artikili II, nr. 3-mi ilaasunut atuutinngilaq.